

薛文清公全書

文集

五

文清公薛先生文集卷之七

門人關西張鼎校正編輯

律詩

簡楊景端

我到城中已五日子在山間不一來應畏風寒歷氷
雪想憂澗滑行莓苔石泉統戶只自語柴門竟日因
誰開始射今朝好晴色相期握手登崔嵬

留贈楊景端二首

千里歸來訪故人喜聞結屋澗之濱手披青史尋高
士頭戴烏巾學隱倫樽酒細傾延好客斑衣輕舞奉

慈親自慙東抹西塗手又促行珂覲 紫宸

又

祗聞騰踏上亨衢何事中林又卜居谷口引泉看灌
漑隴頭植杖勸耕鋤還同主婦供親膳更課兒童讀
古書莫向家山窮此樂好將功業贍唐虞

簡孔別駕遊禹門用謝太守韻二首

別駕乘春訪勝遊禹門佳處重遲留兩邊翠壁連天
起三級銀河入海流變化豈無神異物往來應有濟
川舟遙遙明德人知否地闢天成幾萬秋

雙旌曾向禹門遊別駕今來亦暫留岸斷雲霞開翠

壁天連棧閣駕黃流千金尚想波心瓠萬斛深期渡
口舟如此山川元不惡可無詩句記春秋

冬至二首

九野蒼蒼閔太陰重淵脉脉動天心庖犧易有千年
畫康節詩存半夜吟忽向靜中聞齟齬却從無處見
森森固知一氣何曾息祇是天根辯古今

萬古天開只此時却憐春意正如絲群生已向無中
見一氣還從靜處移匝地寒風徒凜凜行天化旨漸
遲遲吾心欲說知何似靜裏仍含未動機

讀文山傳三首

朔氣蕭森歲向深揮戈挾淚動哀吟艱危已竭回天
力慷慨猶存捧日心海水尋常秋月冷塞雲千里暮
星沉悠悠往事都如夢只有孤忠照古今

丞相聲名二百年分明往事在遺編初離故國悲禾
黍再立危邦慘杜鵑大勢已傾寧畏死孤忠自許敢
求全當時桃李知何限回首春風盡落然

氛祲冥冥暗海波英雄無地用干戈精忠在我當如
此成敗由天柰若何渺渺蒼梧西日淡蕭蕭大地北
風多睢陽錦里皆祠廟永相勛名共不磨

登南坡

土阜層層有萬盤
偶來高頂望人寰
蒲川宿麥浮青浪
一帶晴嵐列翠鬟
何處雲霞迷磧石
數村桑柘繞綿山
唐風晉問憑誰說
地濶天高鴈影閑

春日懷劉僉憲三首

千里關河歸故邑
兩年風景憶虛菴
郢中白雪知誰和
夔下清琴想自譖
君擁霜臺名未已
我傷風木意難堪
近來幾欲裁書寄
春鴈其如不向南

南望中州有所思
山川回首歲華移
早春京索嚼杯處
晚歲嶠函駐馬時
月滿單懷陪款語
霜清河朔寄新詩
舊遊一一成追憶
此後相逢更有期

虛菴事業久礱磨，憲府乘騶歲月多。
已見風霜清郡邑，况聞詞賦動關河。
幾回邂逅情如舊，兩載相思意若何。
自古中州多勝迹，擬從飛蓋盡經過。

重登故鎮寺樓

重來故鎮已三秋，又上招提百尺樓。
山遠飛甍浮翠黛，岸遮遠目斷黃流。
迴溪俯瞰鄰鄰玉，喬木深藏曲曲丘。
莫謂此時窮勝槩，還期汗漫九垓遊。

紀先人舊遊三首

樹已成林麥浦郊，春風春雨自飄蕭。
孤雲出岫飛還逐，衆鳥歸林嘯且招。
俯仰空驚天地在，低迷深覺歲

華遙舊遊山水俱成感技淚思親首屢搔

陰陰夏木繞茅廬曾是先人看寓居梁土又來前度
燕篴中空有昔年書聲音尚想當窓發杖屨猶疑隔
戶趨五內此時摧裂甚詩成滿紙淚如珠

祇願庭椿過百齡寧知奄忽便摧零舊遊山水皆悲
思昔住園廬盡慘情菽水有懽成昨夢衣冠無計覩
平生孫兒指點經行處清淚如泉散漫傾

雨中簡周秉忠三首

獨抱離憂罷酒罇更看連日雨傾盆庭除汨汨深流
潦几硯層層潤積痕往事一編聊自詫永懷千古向

誰論先生最是知音者咫尺何由一扣門

兩耳蕭蕭怯雨聲三更起坐到天明小濡自合通宵
濕大厦何由不日成傾瀉只疑天漢竭奔流深恐地
維傾會須萬里清風至盡掃雲陰放曉晴

客居長日少人過况復經旬積雨多自愛窓前生綠
草不妨門外注銀河頑雲礙日能爲沴流潦因風解
起波爲問郡庠周博士此時官况定如何

贈海昌李太亨四首

客裏終天痛有餘感君相慰意難舒細論往日交情
厚却訝連年音問疎肝膽舊看如古鑑詩篇今覩勝

明珠暫時相見還相別况是關河鴈過初

我在中州若在吳幾年寥落鴈書無每思謝氏登山
屐長憶黃公賣酒壚忽共青燈談肺腑細看白雪點
頭顱英雄不減當時壯耿耿秋空劒氣孤

古今身世其茫茫出處無端總是常才俊從來推賈
誼功名未必老馮唐幾看上谷秋鴻影忽對中州夜
月光 聖代只今登俊彥容江海久徜徉

中州風景正淒清忽與交親話舊情往日襟懷常浩
蕩昔年豪傑漸飄零一渠汴水涵秋碧萬仞嵩山露
曉青勝地相逢應不偶好將佳句詠耆英

簡楊克英府幕

聞道徵租日正忙暫移行幕駐僧房紅蓮沁水浮朝
彩綠樹搖風引夕涼公暇不妨尋好句講時端復炷
名香好將寬政安黎庶留取功名汗簡光

雪後寄楊景端

雪白山青北望高相思咫尺興滔滔若人未必傷沉
鬱吾道何須嘆寂寥董賈文章鳴治世臯夔事業擬
清朝村居不識楊夫子懶慢何心作解嘲

讀許魯齋思親詩并序

洪熙元年冬十二月余扶先人柩至覃懷宣

德元年春正月啓先母空合祔于汾陰先塋
既卒事因檢元音讀至魯齋先生七月望日
思親詩乃悽然有感潸然淚下遂次其韻得
詩三首因書先生詩于前以見先賢誠孝之
心溢于言表雖百載之下讀之猶足使人興
起復書余詩于後以見余不仁不孝不能竭
力于始終視前賢大節有愧云

思却千思與萬思音容無復見當時草窓夜靜燈前
教蔬圃春深膝下嬉將謂百年供色養豈期一日便
生離泰山爲礪終磨滅此恨綿綿未易衰

次韻三首

觸目家山總是思，思親况遇早春時。
日長每聽詩書訓，風暖頻隨杖履嬉。
百載韶華成荏苒，終天涕淚感睽離。
自緣孤子無誠孝，不是人生有盛衰。

風光滿目動哀思，春草春花似舊時。
堂芥已成終古恨，斑斕不復往時嬉。
中宵祗解追前夢，隔歲猶如在遠離。
却憶高堂覽明鏡，曾將華髮嘆年衰。

彷彿音容彷彿思，衣冠出入憶當時。
成人未返林烏哺，稚子曾騎竹馬嬉。
椿老暮庭鳳滅滅，草荒春塚雨離離。
固知罔極恩難報，只恐終天孝易衰。

曲沃道中三首

孟秋雨霽過新田綠樹人家斷復連
汾澮波光晴泛日絳喬山色曉參天
申生大孝留天地里克遺名載簡編
何事齊姜墳上草恐將芳意度流年

四圍山抱一川平新晉猶傳舊日名
汾隰漲消秋色淡虎和宮老父陽明歌
傳烏鳥空遺恨詩賦椒聊謾有情
往事無端何足問且聽父老說秋成

榮陽詠古八首

京索千年罷戰塵空將往事問居民
山川遠近皆陳迹道路東西是要津
黃屋幾回思義士赤精終古有

真人拔山舉鼎知何似馬到烏江感慨頻

萬山依舊接嵩丘京索于今不斷流莊段是非留
墜道項劉成敗有鴻溝古槐樹歷歲時次大海寺
經風雨秋更上高原訪遺跡荒城故壘暮雲稠

日迴天高秋氣清登臨懷古倍多情山連廣武故城
在路入鴻溝草樹平甬道年深無舊迹索流歲久只
新聲興亡莫道都如夢終古猶存楚漢名

楚漢干戈久已休尚存遺迹在中州幾灣流水風烟
暮一片荒城草樹秋力戰可堪離廣武分疆空見指
鴻溝當時四百興劉計只在張良一運籌

蕭蕭涼吹動秋空千古河山一望中廣武連營秋草
碧鴻溝分壤夕陽紅石麟有甲含蒼蘚鉄馬無聲散
曉風何限英豪俱泯滅白雲依舊出層峯

陵谷高低控虎牢戰聲消息水滔滔旌旗滿眼無遺
迹壁壘連雲只舊壕廣武西原通鞏洛萬山南面接
嵩高悠悠往事皆如此懷古登臨何太勞

滎陽景物似當時不見唐朝老畫師隧道莊姜今已
矣京城太叔果何爲留候計用炎光振亞父身亡霸
業衰多少是非成往鑑莫將遺事使人悲

岡巒廻合一川平澗壑高低繞故城千古好山寧改

色滿溪流水不停聲留候總得翁張術漢祖身存駕
馭情更望登高發長嘯當時豪傑已成名

題沈令送別卷

雙鳬縹緲上青霄令尹朝天不憚遙密縣于今思卓
茂淮南自昔想時苗玉階伏引龍旂合寶殿香浮雉
扇高鴻鴈近秋多健翮佳章早慰此心勞

西郊看刈禾二首

爲農每愛寬平地已向中州住七年莫道功名當早
歲且看禾黍熟秋天蕭蕭滿地收霜穗整整成稌積
晚烟濁酒一壺勞僮僕素餐深恐愧前賢